

## Morning Dogri (NSD) Bulletin 23-10-2024

### आकाशवाणी

- प्रधानमंत्री नरेंद्र मोदी होर अज्ज ब्रिक्स शिखर सम्मेलन सवां बक्ख चीन दे राष्ट्रपति हुंदे कन्नै दपक्खी मीटिंग करडन।
- भारत ते पाकिस्तान नै श्री करतारपुर साहिब गलियारे सरबन्धी समझौते दी अवधि गी होर 5 बरें अगड़ा बदाई दिता ऐ।
- 2024 बरें आहले भारत दे अंतरराष्ट्रीय फिल्म समारोह लेई डैलीगेट रजिस्ट्रेशन कराने दा कम्म शुरू होई गेआ ऐ।
- सरकारी मालकी आहली भारत संचार निगम लिमिटेड बीएसएनएल नै उपभोक्ताएं गी आकर्षित करने लेई गाहक आधारत सत नमीं सेवाएं दी शुरूआत कीती ऐ।
- अंतरराष्ट्रीय माली फंड आई.एम.एफ नै मौजूदा माली बरे लेई भारत दी जीडीपी दे बाद्दे दी दर दा अनुमान सत फीसदी पर बनाई रक्खेआ।
- ए.सी.सी. मर्दे दी टी-20 इमर्जिंग टीम एशिया कप च अज्ज समां अल-अमीरात च भारत-ए दा मुकाबला मेजबान ओमान कन्नै होग।

<><><><><><>

## PM-XI-Jinping

प्रधानमंत्री नरेंद्र मोदी होर अज्ज रूस दे कजान च ब्रिक्स शिखर सम्मेलन सवां बक्खरे होइए चीन दे राष्ट्रपति शी जिनपिंग हुंदे कन्ने दपक्खी गल्लबात करडन। दौनें मुल्खें बश्कार असल नियंत्रण रेखा कोल गश्त करने सरबन्धी समझौते तोड़ी पुज्जने दी पछौक्कड़ च इस मीटिंग गी बड़ा महत्वै आहला मन्नेआ जा करदा ऐ। प्रधानमंत्री मोदी ते चीन दे राष्ट्रपति हुंदे बश्कार पिछले 5 बरें च एह पैहली विधिवत मीटिंग ऐ। मोदी होरें रूस ते ईरान दे राष्ट्रपतिं कन्ने बी दपक्खी मीटिंगा लाइयां जेदे च उनें मसलें दा अमन-शांति कन्ने हल कड्डने दी जरूरत पर जोर पाया। उनें आखेआ जे युद्ध कन्ने मसलें दा नबेड़ा नेई हुंदा। श्री पुतिन हुंदे कन्ने मीटिंग दौरान श्री मोदी होरें जोर देइयै आखेआ जे भारत रूस-युक्रेन संघर्ष दा अमन-शांति कन्ने हल कड्डने च मदाद करने लेई तैयार ऐ।

<><><><><><>

## Indian-Pak-Kartarpur

भारत ते पाकिस्तान श्री कारतारपुर साहिब गलियारे बारै समझौते दी अवधि गी 5 बरे होर अगउा बदाने लेई सहमति होई गेन। 24 अक्टूबर 2019 गी इस समझौते पर दस्तखत कीते गे हे। एहदे च भारत दे श्रद्धालुं लेई करतारपुर साहिब गलियारे राएं पाकिस्तान दे नारेवाल च गुरूद्वारा दरबार साहिब करतारपुर जाने दा सरिस्ता कीता गेदा ऐ। इस समझौते दी वैद्यता दी अवधि 5 बरे ही।

विदेश मंत्री डॉ. एस. जयशंकर होंरें इक्क सोशल मीडिया पोस्ट च आखेआ जे नरेंद्र मोदी हुंदी सरकार मुखें दे सिख समुदाय गी उंदी पवित्र थाहें तोड़ी पुज्जत बनाने दी स्थूलत पजाने दा कम्म लगातार जारी रक्खोग।

<><><><><><>

## IFFI

2024 बरे आहले भारत दे अंतरराष्ट्रीय फिल्म समारोह (आई.एफ.एफ.आई) लेई डैलीगेट रजिस्ट्रेशन शुरू होई गेआ ऐ। 55मां आई.एफ.एफ.आई महोत्सव इस बरे 20 कोला लेइयें 28 नवंबर तोड़ी गोवा च लग्गा करदा ऐ। मेदवार वेबसाइट [my.iffigoa.org](http://my.iffigoa.org) पर रजिस्ट्रेशन करदे होई टिकट बुक कराई सकदे न। फिल्में कन्नै जुड़े दे पेशेवरें लेई 1 जहार 180 रपे फीस तैय कीती गेदी ऐ। विद्यार्थियें गी रोज चार टिकटां मुफ्त दितियां जाडन। पंजीकरण करने बारें सुआल [registration@iffigoa.org](mailto:registration@iffigoa.org) पर ई-मेल राएं पुच्चे जाई सकदे न। इस फिल्म समारोह च विश्व स्तरें दियां फिल्मां, लघु फिल्मां, नाटक दस्से जाडन।

<><><><><><>

## BSNL

भारत संचार निगम लिमिटेड-बी.एस.एन.एल नै उपभोक्ताएं गी आकर्षित करने आस्तै 7 नमियें गाहकें पर केंद्रित सेवाएं दी शुरूआत कीती ऐ। केंद्री संचार मंत्री ज्योतिरादित्य सिंधिया होंरें आखेआ जे 4-5 भारत संचार निगम लिमिटेड आसेआ 4-जी नेटवर्क दी शुरूआत दे बाद गाहकें दी गिनतरी पिछले 6 म्हीने च 75 लक्ख शा बदिये 1 करोड़ 80 लक्ख होई गई ऐ।

नमीं दिल्ली च बीएसएनएल दे नमें लोगो ते 7 नमीं सेवाएं दा उद्घाटन करदे होई सिंधिया होरें आखेआ जे भारत विश्व दे उनें 6 देशें च शामिल होई गेआ ऐ जिनें अपना 4-जी नेटवर्क विकसित कीता ऐ ते तौलें गै इस्सै 5 जी नेटवर्क च बदलेआ जाग। बीएसएनएल दा नमां लोगो विकास, पुज्ज ते विश्वास दा प्रतीक ऐ।

<><><><><><>

### ED-Unitech

प्रवर्तन निदेशालय ई.डी नै यूनिटेक इंटरनेशनल रियल्टी फंड दी 319 करोड़ रपे सोयां मती ते सहाना बिल्डर्स प्राइवेट लिमिटेड दी 16 करोड़ दी चल संपत्तिएं गी अस्थाई तौर पर जब्त करी लैता ऐ। इनें संपत्तिएं गी रपे-पैसे दे हेर-फेर दी रोकथाम सरबंधी कनून दे प्रावधान तैहत जब्त कीता गेआ ऐ। ई.डी नै इस मामले च यूनिटेक लिमिटेड ते होरनें दुए पक्खें खिलाफ दिल्ली पुलिस ते सीबीआई आसेआ दर्ज कीती गेदी एफ.आई.आर दे आधार पर जांच शुरू कीती ऐ।

<><><><><><>

### IMF-India

अंतरराष्ट्रीय मुद्रा कोष नै 31 मार्च 2025 गी खत्म होने आहले चालू माली बरे च भारत दे सकल घरेलू उत्पाद दी वृद्धि दर 7 फीसदी बनाई रक्खी ऐ। दुनिया दी आर्थिक स्थिति बारै च नमें अनुमान च आई.एम.एफ नै आखेआ जे अगले माली बरे 2025-26 च भारत दी वृद्धि दर साइडे 6 फीसद रौहने दी मेद ऐ।

डेलाइट इंडिया नै बी अपने नमें आर्थिक परिदृश्य च भारत दी वृद्धि दर चालू माली बरे च 7 ते 7 अशारिया 2 फीसद बश्कार रौहने दी मेद जाहिर कीती ऐ।

<><><><><><>

### Coal-Minister

केंद्री कोयला मंत्री जी. किशन रेड्डी होरें कोयला क्षेत्र च पर्यावरण अनुकूल उत्पादन ते कुदरती वातावरण प्रति जिम्मेदारी दे महत्व पर जोर पाया। नमीं दिल्ली च कोयला क्षेत्र बारै च छमाही समीक्षा बैठक दी अध्यक्षता करदे होई मंत्री होरें कोयला उत्पादन बढ़ाने आस्तै नमीं तकनीकें गी अपनाने ते पर्यावरण दे माड़े असर गी रोकने दे उपायें दी जरूरता पर जोर पाया। खदान मजूरें दे परौआरें प्रति चिंता जाहिर करदे होई किश रेड्डी होरें सख्त सुरक्षा नियमं ते सिखलाई कार्यक्रम राएं कम्मगारें दी सुरक्षा पर जोर पाया।

<><><><><><>

### IMD

मौसम विभाग नै ओडिशा सने मुख्य दे पूर्वोत्तर हिस्सें च तेज बरखा होने दी शैका जाहिर कीती ऐ। तमिलनाडू, पुडुचेरी, कर्नाटक ते केरल च बी अज्ज तेज बरखा होने दी संभावना ऐ। गांगेय पच्छिम बंगाल च अज्ज ते कल झारखंड च हल्की थवां दरम्याने दर्जे दी बरखा होने दी बी संभावना ऐ। उत्थें गै अगले 2 थवां त्रै दिनें दौरान कोंकण, गोआ ते महाराष्ट्र दे मध्य हिस्सें च बी हल्की थवां दरम्याने दर्जे दी बरखा पेई सकदी ऐ।

<><><><><><>

## T-20

ACC मर्दे दे टी-20 Emerging Teams Asia Cup च अज्ज अल अमीरात क्रिकेट मैदान च भारत-ए दा मुकाबला ओमान कन्नै होग। एह मैच भारतीय समें मूजब संझा 7 बजे शुरू होग। टीम दी अगुवाई तिलक वर्मा होर करा रदे नं इंडिया-ए नै तिलक वर्मा हुंदी अगुवाई च सैमीफाइनल च अपनी थाह पैहले गै पक्की करी लैती दी ऐ।

<><><><><><>

## Common-Wealth Games

बरे 2026 च आयोजित होने आहले राष्ट्रमंडल खेड्डे दे आयोजके, हॉकी, बैडमिंटन, रेस्लिंग, क्रिकेट, स्कवैश जनेई खेड्डे गी प्रतियोगिता थां हटाने दा फैसला लैता ऐ। आयोजके जे राष्ट्रमंडल खेड्डे दे अगले संस्करण च छडियां 10 खेड्डां शामिल कीतियां जाडन। 23मीं राष्ट्रमंडल खेड्डां 2026 च 23 जुलाई थां 2 अगस्त बश्कार स्कॉटलैंड दे Glasgow च आयोजित होडन। इंदे च भारत सने 74 राष्ट्रमंडल मुखे दे तकरीबन 3 जहार खडारी हिस्सा लैडन।

<><><><><><>